



БАСПАНА БАҒАСЫ БАҚЫЛАУСЫЗ ҚАЛДЫ



Алматыда қаншама тұрғын үй бой көтеріп жатса да, баспана мәселесі әлі қазақтың басты арманы болып тұр. Сұраныс болған соң сатылатын да, жалға берілетін де пәтердің құны жоғары. Әсіресе, биылғы жаңа оқу жылы қарсаңында баға шарықтап кетті. Оған пандемияның да әсері бар. Жоғары оқу орындары жатақханадағы бір бөлмеге екі студенттен артық орналастырмау туралы шектеу қойған соң, пәтер іздеушілер қатары студенттермен толықты. Статистикаға сенсек, қыркүйек айының қарсаңында Алматыдағы жалдамалы пәтер бағасы 30%-40%-ға қымбаттаған.

(Соңы 3-бетте)



МЕМЛЕКЕТТІК
БАҒДАРЛАМАЛАРДЫҢ
ЕСЕБІ ЖОҚ ПА?

3-бет



ЕРТЕ ҮЗІЛГЕН
ЖАУҚАЗЫН

8-бет

СӘТІ ТҮСКЕН СҰХБАТ

Сәт ТОҚПАҚБАЕВ,
генерал-полковник:

«ЕЛ ТАҒДЫРЫ ҮШІН ӘР ҚАЗАҚ ЖАУАПТЫ»



– Сіздің өмір тарихыңызға қарап отырсақ, колхоз жұмысшысынан бастап генерал-полковник шеніне дейінгі үлкен тәжірибе мектебінен өтіңіз. Қарапайым ауыл азаматы мұндай биікке қалай жетті? Сізде не көмектесті? Тәрбие ме, орта ма, мақсат жолындағы табандылық па? Жалпы бала Сәт қандай еді?

– Бала кезімде қайтсем де барлаушы болам, органда қызмет етемін деген арманға ұмтылыс болды. Әлі есімде, анам таңғы сағат бес жарымда тұрып, біздің тамағымызды дайындап бергеннен кейін қызылша алқабында жұмыс істейтін.

(Соңы 5-бетте)

ҚР СУДЬЯЛАР ОДАҒЫНА – 25 ЖЫЛ

СУДЬЯЛАР ОДАҒЫ ОРТАЛЫҚ КЕҢЕСІНІҢ ҮНДЕУІ

Құрметті әріптестер!

2021 жылдың желтоқсанында біз Қазақстан Республикасы Судьялар одағының құрылғанына 25 жыл толуын атап өтуді жоспарлап отырмыз. Өздеріңіз білетіндей, бұл тарихи оқиға 1996 жылғы 19 желтоқсанда Алматы қаласында өткен судьялардың I съезінде орын алды. Съезд делегаттары сол кезде өзін-өзі басқаратын судьялар қауымдастығы органының қажеттілігі туралы идеяны бірауыздан қолдаған болатын.

Съезд республикалық қоғамдық бірлестік құру туралы қаулы, жарғы, Судья әдеби кодексі, филиалдар туралы ережені қабылдап, мақсаттар мен міндеттерді айқындап, кәсіби мүдделерді қорғауды Судьялар одағы қызметінің басты бағыты деп белгіледі. Ұйымның қуатты біріктіруші әлеуеті отан-

дық сот жүйесін дамытатын іргетасқа айналды, судьялардың кәсіби ынтымақтастығы мен тұтастығын нығайтуға ықпал етті.

Өткен 25 жыл ішінде Судьялар одағының 8 съезі өтті, олардың әрқайсысы жаңа кезең үшін бағыт-бағдар берді, өзіндік тәуелсіз сот жүйесінің

даму тұстары мен құрылым бағыттарын айқындап, қалыптасқан дәстүрлерді, ұрпақтар сабақтастығын, тәжірибені нығайтты. Тәжірибе көрсеткендей, судьялар съезі – бұл таяудағы төрт жылға арналған іс-қимыл стратегиясы мен басымдықтары ғана емес, сондай-ақ, сот төрелігін іске асырудың аса сезімтал салаларындағы жүйелі проблемалар мен кедергілер туралы ашық әңгіме. Әрбір съездің қорытындысы бойынша нақты және ақылға қонымды заңнамалық нормалар мен ережелерді құру бойынша шаралар қабылданады, сот ісін жүргізуді ұйымдастыруға қатысты тәртіп енгізіледі, судьялардың ар-намыс және мінез-құлық кодексінің, кәсіби этикасының қағидаттары әзірленеді.

(Соңы 2-бетте)

РИЭЛТОРЛАР ЖҰМЫСЫН ҚАДАҒАЛАУ МҮМКІН БЕ?

Максат ХАЛЫҚ, экономист:

– Шынымен бұл мәселе қатты ушығып кетті. Өзім де жоғары оқу орнында ұстаз болғандықтан, осы мәселеге қатты алаңдаймын. Аймақтардан келген студенттер жататын жер таппай сандалып жүр. Пәтер бағасы былтырғымен салыстырғанда екі есеге дейін артып кеткен. Сондықтан негізсіз өскен пәтер бағасына бақылау керек.

Атап өтер жайт, баспана мәселесін шешу үшін мемлекет тарапынан қаншама бағдарламалар жүзеге асып жатыр. Жыл сайын салынатын үйлердің көлемі де ұлғаяуда. Алайда, баспана мәселесі шешілудің орнына, күннен-күнге күрделеніп барады. Сондықтан бұл мәселеге мемлекет араласып, нағыз мұқтаждардың үйлі болып, риэлторлардың заңсыз әрекетіне тосқауыл қойылса дейміз. Негізгі елімізде бағаны қадағалайтын монополияға қарсы комитет жұмыс істейді.

Сұраныстың артуына орай баспананы жалдау ақысы шарықтап кетті. Студенттер қалтасы көтермесе де амалсыздан хостел жағалап, бірнешеуі бірігіп пәтерді жалдауда. Бағаны қолдан көтеріп, нарықта хаос тудырып, алаяқтық әрекеттерімен халықты тағырыққа тіреп отырған риэлторларды тәртіпке шақыра аламыз ба?

Ата-анаға оқудың құны да аз салмақ емес. Оған пәтер бағасы қосылса не болмақ? Осыған дейін баспана бағасының өсуіне сарапшылар пандемияны, зейнетақы қорындағы қаржыны пайдаланушылардың артқанын сылтау етіп келді. Енді баспананың қымбаттауын құрылыс материалдары бағасының өсуімен байланыстырып жатыр.

Сапарбай ЖҰБАЕВ, экономист:

– Негізгі жыл сайын студенттердің алып мегаполиске келуімен бірге, жалдамалы пәтер бағасы да көтерілетін. Биыл студенттер қатарының жылдағыдан көп болуы бағаның да жылдағыдан анағұрлым өсуіне ықпал етті. Екі бөлмелі пәтердің жалдау құнын 250-280 мың теңгеге көтеру шынымен де нарықтың бақылаусыз қалғанын көрсетеді. Қымбатшылық сұраныстың көптігінен орын алып отыр. Мұндай қаржыны қалтасы көтермейтін студенттер қазір 7-8 баладан бірігіп пәтер жалдауда. Ал бір бөлмеге тығылған балалардың денсаулығына кім жауап береді?! Сондықтан әрбір ЖОО өз студенттерін өздері қамтамасыз етуді мойнына алуы керек.

(Соңы 3-бетте)

